

摘藻堂四庫全書薈要

子部

欽定四庫全書叢要

子部

唐撫言卷一
一至三



詳校官兵部主事臣雷純

欽定四庫全書薈要

唐摭言目錄

卷一

統序科第

貢舉釐革并行鄉飲酒

會昌五年舉格節文

述進士上篇

述進士下篇



散序進士

兩監

西監

東監

鄉貢

廣文

兩都貢舉

試雜文

朝見

謁先師

進士歸禮部

卷二

京兆府解送

元和元年登科記京兆等第榜序

廢等第

置等第

府元落

等第末為狀元

等第罷舉

為等第後久方及第

海述解送

爭解元

扣貢院門求
試後到附

得失以道

恚恨

卷三

散序

謝恩

期集

點檢文書

過堂

關試

讌名

今年及第明年登科

慈恩寺題名遊賞賦咏雜記

卷四

節操

與恩地舊交

師友

氣義

卷五

切磋

以其人不稱才試而後驚

卷六

公薦

門生薦坐主
師友相薦附

卷七

起自寒苦

不第即
貴附

好放孤寒

升沈後進

知已

卷八

通榜

主司撓悶

陰注陽受

夢

聽響卜

自放狀頭

遭遇

友放

誤放

憂中有喜

為鄉人輕視而得者

以賢妻激勸而得者

已落重收

放老

及第與長行拜官相次

別頭及第

及第後隱居

入道

卷九

防慎不至

誤掇惡名

好知己惡及第

好及第惡登科

勅賜及第

表薦及第

惡得及第

芳林十哲

四凶

卷十

載應不捷聲價益振

海叙不遇

韋莊奏請追贈不及第人近代者

卷十一

反初及第

反初不第

無官

薦舉不捷

已得復失

以德報怨

惡分疎

怨怒

貢直附

卷十二

自負

輕佻

戲謔嘲咏附

設奇沽譽

酒失

卷十三

敏捷

矛盾

惜名

無名子謗議

卷十四

主司稱意

主司失意

卷十五

雜記

條流進士

閩中進士

賢僕夫

舊語

切忌

沒用處

臣等謹案唐摭言十五卷五代王定保撰定

保舊本不題其里貫其散序一篇稱王溥為從翁則溥之族也陳振孫書錄解題謂定保為吳融之壻光化三年進士喪亂後入湘南考定保登第之歲距朱溫篡唐僅六年又序中稱溥為丞相則是書成于顯德元年以後故題唐國號不復作內詞歟然定保生于咸通庚寅至是年八十五矣不審何以尚能著

書也同時南唐鄉貢士何晦亦有唐撫言十
五卷與定保書同名今晦書未見而定保書
刻於商氏稗海者刪削大半殊失其真此本
為松江宋賓王所錄末有跋語稱以汪士鉉
本校正較稗海所載特為完備近日揚州新
刻即從此錄出者也惟是晁公武讀書志稱
是書分六十三門而此本實一百有三門數
目差舛不應至是豈商濬之前已先有刪本

耶是書述有唐一代貢舉之制特詳多史志
所未及其一切禱事亦足以覘名場之風氣
驗士習之淳澆法戒兼陳可為永鑒不止小
說禱家但記異聞已也據定保自述蓋聞之
陸扈吳融李渥顏堯王溥王渙盧延讓楊贊
圖崔籍若等所談云乾隆四十一年七月恭
校上

總纂官臣紀昀臣陸錫熊臣孫士毅

總校官臣陸費墀

欽定四庫全書薈要卷一萬一千二百四十七

子部

唐撫言卷一

唐 王定保 撰

統序科第

周禮鄉大夫具鄉飲酒之教考其德行察其道藝三年
舉賢者貢于王庭非夫鄉舉里選之義源于中古乎夫
子聖人始以四科齒門弟子後王因而範之漢革秦亂
講求典禮亦解循塗方輟以須賢俊考德行則升孝廉

而激浮俗掄道藝則第雋造而廣人文故郡國貢士無
虛歲矣繇是天下上計集于大司徒府所以顯五教于
萬民者也我唐沿隋法漢孜孜矻矻以事草澤琴瑟不
改而清濁殊塗丹漆不施而豐儉異致始自武德辛巳
歲四月一日勅諸州學士及蚤有明經及秀才俊士進
士明于治體為鄉里所稱者委本縣考試州長重覆取
其合格每年十月隨物入貢斯我唐貢士之始也厥有
沿革錄之如左

貢舉釐革并行鄉飲酒

開元二十五年二月勅應諸州貢士上州歲貢三人中
州二人下州一人必有才行不限其數所宜貢之人解
送之日行鄉飲禮牲用少牢以官物充

會昌五年舉格節文

公卿百寮子弟及京畿內士人寄客外州府舉士人等
修明經進士業者並隸名所在監及官學仍精加考試
所送人數其國子監明經舊格每年送三百五十人今

請送二百人進士依舊格送三千人其隸名明經亦請
送二百人其宗正等進士送二十人其東監同華河中
所送進士不得過三十人明經不得過五十人其鳳翔
山南西道東道荆南鄂岳湖南鄭滑浙西浙東廊坊宣
商涇邠江南江西淮南西川東川陝虢等道所送進士
不得過一十五人明經不得過二十人其河東陳許汴
徐泗易定齊德魏博澤潞幽孟靈夏淄青鄆曹兗海鎮
冀麟勝等道所送進士不得過一十人明經不得過十

五人金汝鹽豐福建黔府桂府嶺南安南邕容等道所
送進士不得過七人明經不得過十人其諸支郡所送
人數請申觀察使為解都送不得諸州各自申解諸州
府所試進士雜文據元格並合封送省准開成三年五
月三日勅落下者今緣自不送所試以來舉人公然拔
解今諸州府所試各須封送省司檢勘如病敗不近詞
理州府妄給解者試官停見任用闕

述進士上篇

永徽已前俊秀二科猶與進士並列咸亨之後凡由文學舉于有司者競集于進士矣繇是趙儉等嘗刪去俊秀故目之曰進士登科記古者閭有序鄉有庠以時教行禮而視化焉其有秀異者則升于諸侯之學諸侯歲貢其尤著者移之于天子升于太學故命曰造士然後命焉周禮大樂正論造士之秀者以告于王而升諸司馬司馬論辨官材論進士之賢以告于王者而定其論論定然後官之任官然後爵之位定然後祿之若列之

于科目則俊秀盛於漢魏而進士隋大業中所置也如
侯君素孫伏伽皆隋之進士也明矣然彰於武德而甲
於貞觀蓋文皇帝修文偃武天贊神授嘗私幸端門見
新進士綴行而出喜曰天下英雄入吾彀中矣若乃光
宅四夷垂祚三百何莫由斯之道者也

述進士下篇

元和中中書舍人李肇撰國史補其畧曰進士為時所
尚久矣是故俊乂實在其中由此而出者終身為文人

故爭名常為時所重其都會謂之舉場通稱謂之秀才
投刺謂之鄉貢得第謂之前進士互相推敬謂之先輩
俱捷謂之同年

近年及第未過關試皆稱新及第進士所以韓中丞儀嘗有知聞近過關試儀

以一篇紀之曰短行納了付三銓休把新衙
惱必先今日便稱前進士好留春色與明年有司謂之

座主京兆府考而升者謂之等第外府不試而貢者謂

之拔解

然拔解亦須預託人為詞賦非謂白薦

將試各相保謂之合保羣

居而賦謂之私試造請權要謂之關節激揚聲價謂之
還往既捷列名於慈恩寺塔謂之題名大宴於曲江亭

子謂之曲江會

曲江大會在關試後亦謂之關宴宴藉後同年各有所之亦謂之為離會

而入選謂之春關不捷而醉飽謂之打盹燥匿名造謗謂之無名子退而肄業謂之過夏執業以出謂之夏課

亦謂之秋卷

挾藏入試謂之書策此其大畧也其風俗繫於

先達其制置存於有司雖然賢者得其大者故位極人臣常有十二三登顯列十有六七而元魯山張睢陽有馬劉闢元倫有馬

散序進士

進士科始於隋大業中盛於貞觀永徽之際搢紳雖位
極人臣不由進士者終不為美以至歲貢常不減八九
百人其推重謂之白衣公卿又曰一品白衫其艱難謂之
三十老明經五十少進士其負倜儻之才變通之術蘇
張之辨說荆聶之膽氣仲由之武勇子房之籌畫弘羊
之書計方朔之詼諧咸以是而晦之修身慎行雖處子
之不若其有老死於文場者亦所無恨故有詩云太宗
皇帝真長策賺得英雄盡白頭獨孤及撰河南府法曹

參軍張從師墓誌云從師祖損之隋大業中進士甲科
位至侍御史諸曹員外郎損之生法以碩學麗藻名動
京師亦舉進士自監察御史為會稽令

兩監

按實錄西監隋制東監龍朔元年所置開元以前進士
不由兩監者深以為恥李華員外寄趙七侍御詩畧曰
昔日蕭邵友四人才成童

華與趙七侍御驛蕭十功曹
穎士故邵十六司倉軫未冠

遊太學皆苦貧共敝
五人登科相次典校

邵後二年擢第以寬橫貶卒南中

又郭代公崔湜范履冰輩皆由太學登第李肇舍人撰國史補亦云天寶中袁咸用劉長卿分為朋頭是時常重兩監爾後物態澆漓矜于世祿以京兆為榮美同華為利市莫不去實務華棄本遂末故天寶二十載勅天下舉人不得言鄉貢皆須補國子及郡學生廣德二年制京兆府進士並令補國子生斯乃救壓覆者耳奈何人心既去雖拘之以法猶不能勝矧或執大政者不常其所立既非自我則所守亦不堅矣繇是貞元十年

已來殆絕於兩監矣貞觀五年已後太宗數幸國學遂

增築學舍一千二百間增置學生凡三千二百六十員

無何高麗百濟新羅高昌吐蕃諸國酋長亦遣子弟請

入國學之內八千餘人國學之盛近古未有至永淳以

後乃廢龍朔二年九月勅學生在學各以長幼為序初

入學皆行束脩之禮各絹三匹四門學生各絹二匹雋

士及律書算學州縣學各絹一疋皆有酒脯其分束脩

三分入博士二分助教又每年國子監所管學生國監

試州縣學生當州試並藝業優長者為試官仍長官監
試其試者通計一年所授之業口問大義十條得八已
上為上得六已上為中得五已下為下類三不及在學
九年律生六年不任貢舉者並解退其從縣向州者數
下第並須通計服闋重任者不在計限諸博士助教皆
分經授每一經必令終講未終不得改業開元二十一
年五月勅諸州縣學生二十五已下八品九品子弟若
庶人並年二十一已下通一經已上未及一經而精神

聽悟有文詞史學者每年銓量舉送所司簡試聽入四
門學充俊士即諸州貢人省試下第情願入學者聽國
子監所管學生尚書省補州縣學生州縣長官補州縣
學生取郭下縣人替諸州縣學生習本業之外仍令兼
習吉凶禮公私有禮事令示儀式餘皆不得輒使諸百
姓立私學其欲寄州縣學授業者亦聽會昌五年正月
勅公卿百寮子弟及京畿內土人寄修明經進士業者
並宜隸名太學外州寄學及土人並宜隸名所在官學

永為常制

西監

元和二年十二月奏兩京諸館學生總六百五十員每館定額如後西京學生五百五十員國子監八十員太學七十四員四門館三百員廣文館六十員律館算館各十員又奏伏見天寶已前國學生其數至多並有員額至永泰後西監置五百五十員東監近置一百員未定每館員額今謹具每館定額如前伏請下禮部准格

補置勅旨依

東監

東監元和二年十二月勅東都國子監量置學生一百
員國子館十員太學十五員四門五十員律館十員廣
文館十員書館三員算館二員

鄉貢

鄉貢里選盛於中古乎今之所稱蓋本同而末異也今
之解送則古之上計也漢武帝置五經博士

博士奉常
通古今員

數十人漢置五經而已

太常選民年十八已上好學者補弟子郡

國有好文學敬順於鄉黨者令與計偕授業太常如弟

子一歲輒課通經藝補文學掌故上第為郎其秀異等

太常以名聞其下才不事學者罷之若等雖舉於鄉亦

由於學兩漢之制蓋本乎周禮者也有唐貞觀以前兩

監之外亦頗重郡府學生然其時亦由鄉里所升直補

監生而已爾後膏粱之族率以學校為鄙事若鄉貢蓋

假名就貢而已景雲之前鄉貢歲二三千人蓋用古之

鄉貢也咸亨五年七世伯祖鸞臺鳳閣龍石白水公時
任考功員外郎下覆試十一人內張守真一人鄉貢開
耀二年劉思立下五十一人內雍思泰一人永淳二年
劉廷奇下五十五人內元求仁一人光宅元年閏七月
二十四日劉廷奇重試一十六人內康廷芝一人長安
四年崔湜下四十一人李溫玉稱蘇州鄉貢景龍元年
李欽讓稱定州鄉貢附學爾來鄉貢漸廣率多寄應者
故不甄別於牒中信本同而末異也明矣大厯中楊綰

疏請復舊章貴全乎實尋亦寢於公族垂空言而已

廣文

天寶九年七月詔於國子監別置廣文館以舉常修進士業者斯亦救生徒之離散也始其春官氏擢廣文生者名第無高下貞元八年歐陽詹第三人李觀第五人爾來此類不乏暨大中之末咸通乾符以來率以為末第或曰鄉貢賓也學生主也主宜下於賓故列於後也大順二年孔魯公在相位思矯其弊故特置吳仁璧於

蔣肱之上明年公得罪去職及第者復尋常而已悲夫
兩都貢舉

永泰元年始置兩都貢舉禮部侍郎官號皆以知兩都
為名每歲兩地別放及第自大厯十一年停東都貢舉
是後不置

試雜文

進士科與雋秀同源異派所試皆答策而已兩漢之制
有射策對策二義者何射者謂列策於几案貢人以矢

授之隨所中而對之也對則明以策問授其人而觀其
臧否也如公孫弘董仲舒皆由此而進者也有唐自高
祖至高宗靡不率由舊章垂拱元年吳師道等二十七
人及第後勅批云畧觀其策並未盡善若依令式及第
者惟祇一人意欲廣收其材通三者並許及第後至調
露二年考功員外劉思立奏請加試帖經與雜文文之
高者放入策尋以則天革命事復因循至神龍元年方
行三場試故常列詩賦題目於榜中矣

朝見

國朝舊式天下貢士十一月一日赴朝見長壽二年拾遺劉承之上疏請元日舉人朝見列於方物之前從之見狀臺司按覽中使宣口勅慰諭建中元年十一月朝集使及貢士見於宣政殿兵興以來四方不上計內外不會同者二十五年矣今計吏至一百七十三人矣仍令朝集使每日二人待制

謁先師

開元五年九月詔曰古有賓獻之禮登於天府揚於王
庭重學尊師興賢進士能美風俗成教化蓋先王之繇
焉朕以寡德欽若前政思與子大夫復臻於理故他日
訪道有時忘餐乙夜觀書分宵不寐悟專經之義篤學
史之文永懷覃思有足尚者不示褒崇孰云獎勵其諸
州鄉貢明經進士見訖宜令引就國子監謁先師學官
為之開講質問其義宜令所司優厚設食兩館及監內
得舉人亦准其日清資官五品已上及朝集使往觀禮

即為常式易曰學以聚之問以辨之詩曰如切如磋如琢如磨此朕所望於習才也

進士歸禮部

俊秀等科比皆考功主之開元二十四年李昂員外性剛急不容物以舉人皆飾名求稱搖蕩主司談毀失實竊病之而將草馬集貢士與之約曰文之美惡悉知之矣考校取舍存乎至公如有請託于時求聲於人者當首落之既而昂外舅常與進士李權鄰居相善乃舉權

于昂昂怒集貢人召權庭數之權謝曰人或畏知竊聞於左右非敢求也昂因曰觀衆君子之文信美矣然古人云瑜不掩瑕忠也其有詞或不典將與衆評之若何皆曰唯公之命既出權謂衆曰向之言其意屬我也吾誠不第決矣又何藉焉乃陰求昂瑕以待之異日會論昂果斥權章句之疵以辱之權拱手前曰夫禮尚往來而不往非禮也鄙文不臧既得而聞矣而執事昔有雅什嘗聞於道路愚將切磋可乎昂怒而嘻笑曰有何

不可權曰耳臨清渭洗心向白雲閒豈執事之詞乎昂
曰然權曰昔唐堯衰老厭倦天下將禪于許由由惡聞
故洗耳今天子春秋鼎盛不揖讓於足下而洗耳何哉
是時國家寧謐百寮畏法令兢兢然莫敢跌昂聞惶駭
蹶起不知所酬乃訴於執政謂權風狂不遜遂下權吏
初昂強懷不受囑請及是有請求者莫不允從由是廷
議以省郎位輕不足以臨多士乃詔禮部侍郎專之矣
論曰永徽之後以文儒亨達不由兩監者稀矣于時場

籍先兩監而後鄉貢蓋以朋友之臧否文藝之優劣切

磋琢磨匪朝伊夕抑揚去就與衆共之有如趙邵蕭李

趙驊

邵軫蕭

婁郭苑陳

婁師德郭元振苑咸陳子昂

靡不名遂功成

類士李華

交全分契洎乎近代厥道寢微玉石不分薰蕕錯雜長

我之望殊缺遠方之來亦乖止謂羣居固非瓦合是知

生而知之者性也學而知之者習也渾金璞玉又何追

琢之勞乎潢汙行潦又何版築之置乎紵衣之獻彼跡

踈而道親也畫龍之効斯面交而心賊也後之進者定

交擇友當問道之何如

唐撫言卷一

欽定四庫全書薈要卷一萬一千二百四十八

子部

唐撫言卷二

唐 王定保 撰

京兆府解送

神州解送自開元天寶之際率以在上十人謂之等第
必求名實相副以滋教化之源小宗伯倚而選之或至
渾化不然十得其七八苟異於是則往往牒貢院請落
由暨咸通乾符則為形勢吞嚼臨制近同及第得之者

互相誇詫車服侈靡不以為僭仍期集人事貞實之士
不復齒所以廢置不定職此之由其始末錄之如左

元和元年登科記京兆等第榜叙

天府之盛神州之雄選才以百數為名等列以十人為
首起自開元天寶之世大厯建中之年得之者搏躍雲
衢階梯蘭省即六月冲霄之漸也今所傳者始于元和
丙戌歲次序名氏目曰神州等第錄

廢等第

開成二年大尹崔珙判云選文求士自有主司州府送名豈合差等今年不定高下不鎖試官既絕猜嫌暫息浮競差功曹盧宗回主試除文書不堪送外便以所下文狀為先後試雜文後重差司錄侯雲章充試官竟不列等第明年崔珙出鎮徐方復置等第

大中七年韋澳為京兆尹榜曰朝廷將裨教化廣設科場當開元天寶之間始專明經進士及貞元元和之際又益以薦送相高當時唯務切磋不分黨甲絕僥倖請

託之路有推賢讓能之風等列標名僅同科第既為盛事固可公行近日以來前規頓改互爭強弱多務奔馳定高卑於下第之初決可否於差肩之日曾非考覈盡繫經營與學雄文例舍于貞方寒素增年矯貌盡取於朋比羣強雖中選者曾不足云而爭名者益熾其事澳叨居畿甸合貢英髦非無藻鑑之心懼有愛憎之謗且李膺以不察孝廉去任胡廣以輕舉茂才免官況在管窺實難裁處況禮部格文本無等第府解不合區分其

今年所合送省進士明經等並以納策試前後為定不在更分等第之限

置等第

乾符四年崔涓為京兆尹復置等第差萬年縣尉公乘
億為試官 試火中寒暑退賦 殘月如新月詩

李時

文公孫

韋劘

沈駕

羅隱

劉纂

倪曙

唐駢

周繁

池人善賦

吳廷隱

賈涉

其年所試八韻涉擅場而屈其等第

府元落

郭求

元和元年

楊正舉

六年

唐炎

八年

高鉞

九年

平曾

長慶二年

崔伸

寶歷二年

韋鋌

太和二年

鄭從謹

開成二年

韋瑑

乾寧二年

等第末為狀元

李固言

元和七年

等第罷舉

劉鵬

田宅

並元和七年

張僊

韋元佐

並元和八年

孟夷

十二年

韋璟

十四年

辛諒

崔殼

薛渾

並長慶元年

韋漸

李餘

並二年

郭崖

三年

李景方

盧鎰

並寶歷元年

韋教

二年

元道

韋衍

並太和二年

殷恪

劉筠

並八年

崔漬

開成二年

胡澳

樊京

並開元

溫岐

四年

蘇俊

開元

韓宁

會昌二年

李謩

韓肱

並三年

魏鐐

孫璵

並四年

韋劓

沈駕

羅隱

周繁

並乾符三年

為等第後久方及第

韋力仁

趙蕃

黃頗

並十三年

劉纂

後二十一年

論曰孟軻言遇不遇命也或曰性能則命通以此循彼
匪命從於性耶若乃大者科級小者等列當其角逐文
場星馳解試品第潛方於十哲春闈斷在於一鳴奈何
取舍之源殆不踵此或解元永黜或高等尋休黃頗以
洪奧文章蹉跎者一十三載劉纂以平漫子弟汨沒者
二十一年溫岐濫竄於白衣羅隱負冤於丹桂由斯言
之可謂命通性能豈曰性能命通者歟苟怫於是何姦
宄亂常不有之矣

京兆府解試比同禮部三場
試集冠之後並只就一場耳

海述解送

荆南解比號天荒大中四年劉蛻舍人以是府解及第
時崔魏公作鎮以破天荒錢七十萬資蛻蛻謝書畧曰
五十年來自是人廢一千里外豈曰天荒

爭解元

叩貢院門求
試後到附

同華解最推利市與京兆異若首送無不捷者元和中
令狐文公鎮三峯時及秋賦榜云特加置五場蓋詩譌
文賦帖經為五場常年以清要書題求薦者率不減十

數人其年莫有至者雖不遠千里而來聞是皆寢去唯
盧弘正尚書獨詣華請試公命供帳酒饌侈靡於往時
華之寄客畢縱觀於側弘正自謂獨步文場公命日試
一場務精不務敏也弘正已試兩場而馬植下解植將
家子弟從事輩皆竊笑公曰此未可知既而試登山採
珠賦畧曰文豹且異于驪龍採斯疎矣白石又殊於老
蚌剖莫得之公大服其精當遂奪弘正解元後弘正自
丞郎將判鹺俄而為植所據弘正以手札戲植曰昔日

華元已遭毒手今來齟務又中老拳復日試破竹賦

咸通末永樂崔侍中廉問江西取羅鄴為督郵鄴因主
解試時尹璞自遠來求計偕璞有文而使氣鄴挾私黜
之璞大恚怒疏鄴云羅鄴諱則則可知也鄴父則為餘
杭鹽鐵小吏

白樂天典杭州江東進士多奔杭取解時張祐自負詩
名以首冠為已任既而徐凝後至會郡中有宴樂天諷
二子矛盾祐曰僕為解元宜矣凝曰君有何佳句祐曰

甘露寺詩有日月光先到山河勢盡來又金山寺詩有
樹影中流見鐘聲兩岸聞凝曰善則善矣奈無野人句
云千古長如白練飛一條界破青山色祜愕然不對於
是一座盡傾凝奪之矣

大中中紇于峻與魏鐔爭府元而紇于屈居其下翌日鐔
暴卒時峻父方鎮南海由是為無名子所謗曰離南海之
日應得數斤當北闕之前未消一捻因此峻兄弟皆罷舉

張又新時號張三頭

進士狀頭宏詞
勅頭京兆解頭

國朝自廣明庚子之亂甲辰天下大荒車駕再幸岐梁
道殣相望郡國率不以貢士為意江西鍾傳令公起於
義聚庵有疆土充庭述職為諸侯表式而乃孜孜以薦
賢為急務雖州里白丁片文隻字求貢於有司者莫不
盡禮接之至於考試之辰設會供帳申於治平行鄉飲
酒之禮常率賓佐臨視拳拳然有喜色復大會以餞之
筐篚之外率皆資以桂玉解元三十萬解副二十萬海
送皆不減十萬垂三十載此志未嘗稍怠時舉子有以

公卿關節不遠千里而求首薦者歲常不下數輩

合淝李郎中羣始與楊衡符載等同隱廬山號山中四

友

內一人不記姓名

先是封川李相遷閣長會有名郎出牧九

江郡者執辭之際屢以文柄迎賀於公公曰誠如所言

廬山處士四人儻能計偕當以到京兆先後為齒既而公

果主文於是擁旌旗造柴關激之而笑時三賢皆膠固

唯合淝公年十八矍然曰及其成功一也遂束書就貢

比及京師已鎖貢院乃搥院門請引見公問其所止答

云到京後時未遑就館合肥神質瓌秀主司為之動容

因曰不為作狀頭便可延於吾廬矣楊衡後因中表盜

衡文章及第詣闕尋其人遂舉亦及第或曰見衡業古

調詩其自負者有一一鶴聲飛上天之句初遇其人頗

憤怒既而問曰其一鶴聲飛上天在否前人曰此句

知兄最惜不敢輒偷衡笑曰猶可恕矣符在後佐李隲為

江西副使失意去從劉闢

已上李羣與楊衡符載等事
一節事意年代前後不相接

差互
尤甚

高貞公郢就府解後時試官別出題目曰沙洲獨鳥賦
即援筆而成曰馱有飛鳥在河之洲一飲一啄載沈載
浮賞心利涉之地浴質至清之流

其年
首送

得失以道

李翱與弟正辭書

貞元末正辭取京兆解
掾不送翱故以書勉之

其書曰知汝

京兆府取解不得如其所懷念勿在意凡人之窮達所
遇猶各有時爾何獨至於賢丈夫而反無其時哉此非
吾人之所憂也吾所憂者何畏吾之道未到於古人之

際耳其心既自以為到且無謬則吾何往而不得所樂
何必與夫時俗之人同得失憂喜而動於心乎借如用
汝之所知分為十焉用其九學聖人之道而和其心使其
餘者以與時進退俯仰如可求也則不啻富且貴也如
非吾力也雖盡用其十祇益動其心爾安能有所得乎
汝勿信人號文章為一藝夫所謂一藝者乃時俗所好
之文或有盛名於近代者是也其能到古人者則仁義
之詞也惡得一藝而名之哉仲尼孟軻沒千餘歲矣吾

不見其人能知其聖且賢者以吾讀其詞而得之者也
後來者不可欺安知其讀吾詞也而不知吾心之所存
乎亦未可誣也夫性與仁義者未見其無文也有文而
能到者吾未見其不力於仁義也由仁義而後文者天
性也由文而後仁義者習也由誠明之必相依爾貴與
富在乎外者也吾未能知其有無也非吾求而能至者
也吾何愛而屑屑於其間哉仁義與文章生乎內者也
吾知其有也吾能求而充之者也吾何懼而不為哉汝

雖天性過於人然而未能浩浩於其心吾故書其所懷以張汝且以樂言吾道云爾

恚恨

太和初李相回任京兆府叅軍主試不送魏相公謩深銜之會昌中回為刑部侍郎謩為御史中丞嘗與次對官三數人候對於閣門謩曰某頃歲府解蒙明公不送何幸今日同集於此回應聲答曰經呼上如今也不送謩為之色變益懷憤恚後回謫牧建州謩大拜回有啟狀

謬悉不納既而回怒一衙官決杖勒停建州衙官能庇徭役求隸籍者所費不下數十萬其人切恨停廢後因亡命至京師接時相訴冤諸相皆不問會亭午憩於槐陰顏色憔悴傍人察其有私詰之其人具述本意於是誨之曰建陽相公素與中書相公有隙子盍請之言訖魏公導騎自中書而下其人常懷文狀即如所誨望塵而拜導從問對曰建州百姓訴冤公聞之倒持麈尾敲檐子門令止及覽狀所論事二十餘件第一件取同姓

之女入宅於是為魏相極力鍛成大獄時李相已量移
鄧州刺史行次九江遇御史鞫却迴建陽竟坐貶撫州
司馬終於貶所

盧吉州肇開成中就江西解試為試官末送肇有啟謝
曰巨鰲負鼎首冠蓬山試官謂之曰某昨限以人數擠
排雖獲申展深慙名第奉浼焉得翻有首冠蓬山之謂
肇曰必知明公垂問大凡頑石處上巨鰲戴之豈非首
冠耶一座聞之大笑

華良夫常為京兆解不送良夫以書讓試官曰聖唐有天下垂二百年登進士科者三千餘人良夫之族未有登是科者以此慨嘆憤惋從十歲讀書學為文章手寫之文過於千卷

王泠然與御史高昌字書曰僕之怪君甚久矣不憶往日任宋城縣尉乎僕稍善文章每蒙提獎勤勤見遇又以齊甞叨承恩顧銘心在骨復聞升進不出臺省當為風波可望故舊不遺近者伏承皇皇者華出使江外路

次於宋依然舊遊門生故人動有十輩蒙問及者衆矣
未嘗言泠然明公縱欲高心不垂半面豈不畏天下窺
公侯之淺深與著綠袍乘驄馬蹌蹌正色誰敢直言僕
所以數日伺君望塵而拜有不平事欲圖於君莫厭多
言而彰公短也先天年中僕雖幼小未閑聲律輒參舉
選公既明試量擬點額僕之狂落豈肯緘口是則公之
激僕僕豈不知公之辱僕僕終不忘其故亦上一紙書
蒙數遍讀重相摩獎道有性靈云某來年掌試仰取一

名於是遂巡受命匍匐而歸一年在長安一年在洛下
一年坐家園去年冬十月得送今年春三月及第往者
雖蒙公不送今日亦自致青雲天下進士有數自河以
北唯僕而已光華籍甚不是不知君須稍垂後恩雪僕
前恥若不然僕之方寸別有所施何者故舊相逢今日
之謂也僕之困窮如君之往昔君之未遇似僕之今朝
因斯而言相去何遠君是御史僕是詞人雖貴賤之間
與君隔濶而文章之道亦謂同聲而不可以富貴驕人

亦不可以禮義見隔且僕家貧親老常少供養兄弟未
有官資嗷嗷環堵菜色相看貧而賣漿值天冷今冬又
屬停選試遣僕為御史君在貧途見天下文章精神氣
調得如王子者哉實能憂其危拯其弊令公之富貴亦
不可多得意者望御史今年為僕索一婦明年為留心
一官幸有餘力何惜些些此僕之宿憾口中不言君之
此恩頂上相戴儻也貴人多忘國士難期使僕一朝出
其不意與君並肩臺閣側眼相視公始悔而謝僕僕安

能有色於君乎僕生長草野語誠觸忤并詩若干首別
來三日莫作舊眼相看山東布衣不識忌諱泠然頓首
論曰子曰不怨天不尤人下學而上達又曰求己不責
於人君子振跡發身咸覲善地反之於己何得喪之不
常望之於人則愛憎之競作王泠然之負氣推命何疎
魏丞相之復仇尤人太過凌轢險詖二子得之有若李
文公誨弟之書華良夫干時之氣所謂君子之儒也徐
凝馬植豈非得之且武當垂名於不朽矣尹璞所謂雖

文何益後之學者得不以為炯戒哉

唐撫言卷二

欽定四庫全書薈要卷一萬一千二百四十九

子部

唐撫言卷三

唐 王定保 撰

散序

定保生於咸通庚寅歲時屬南蠻騷動諸道徵兵自是
聯翩寇亂中土雖舊第太平里而跡未嘗達京師故治
平盛事罕得博聞然以樂聞科第之美常諮訪於前達
間如丞相吳郡公扆翰林侍郎濮陽公融恩門右省李

常侍渥顏夕拜薨從翁丞相溥從叔南海記室渙其次
同年盧十三延讓楊五十一贊圖崔二十七籍若等十
許人時蒙言及京華故事靡不錄之於心退則編之於
簡策始以進士宴遊之盛案李肇舍人國史補云曲江
大會此為下第舉人其筵席簡率器皿皆隔山拋之屬
比之席地幕天殆不相遠爾來漸加侈靡皆為上列所
據向之下第舉人不復預矣所以長安遊手之民自相
鳩集目之為進士團初則至寡洎大中咸通已來人數

頗衆其有何士參者為之首帥尤善主張筵席凡今年
纔過關宴士參已備來年遊宴之費由是四海之內水
陸之珍靡不畢備時號長安三絕

南院主事鄭容中書門官張良佐并士參

為三絕團司所繇百餘輩各有所主大凡謝後便往期集

院團司先於主司宅側稅一大第與新人期集

院內供帳宴饌甲於輦轂其日狀

元與同年相見後便請一人為錄事

舊例率以狀元為錄事

其餘主宴

主酒主樂探花主茶之類咸以其日辟之主樂兩人一人主

飲妓放榜後大科頭兩人

第一部

小科頭一人

第二部

常詰旦

至期集院常宴則小科頭主張大宴則大科頭縱無宴

席科頭亦逐日請給茶錢

平時不以數後每人日五百文

第一部樂官

科地每日一千第二部五百見燭皆倍科頭皆重分逼

曲江大會則先牒教坊請奏上御紫雲樓垂簾觀焉時

或擬作樂則為之移日故曹松詩云追遊若遇三清樂

行從應妨一日春勅下後人置被袋例以圖障酒器錢

絹實其中逢花即飲故張籍詩云無人不惜花園宿到

處皆携酒器行其被袋狀元錄事同點檢闕一則罰金

曲江之宴行市羅列長安幾於半空公卿家率以其日
揀選東牀車馬闐塞莫可殫述洎巢寇之亂不復舊態
矣

謝恩

狀元已下到主司宅門下馬綴行而立斂名紙通呈入
門並叙立於階下北上東向主司列席褥東面西向主
事揖狀元已下與主司對拜拜訖狀元出行致詞又退
著行各拜主司答拜拜訖主事云請諸郎君叙中外狀

元已下各各齒叙便謝恩餘人如狀元禮禮訖主事云

請狀元曲謝名第第幾人謝衣鉢

衣鉢謂得主司名第其或與主司先人同

名第即謝衣鉢如踐世科即感泣而謝

謝訖即登階狀元與主司對坐于

時公卿來看皆南行叙坐飲酒數巡便起赴期集院

或云

此禮亦不常即有於都省致謝公卿來看或不坐而去

三日後又曲謝其日主司

方一一言及薦導之處俾其各謝挈維之力苟特達而

取亦要言之

期集

謝恩後方詣期集院大凡勅下已前每日期集兩度詣
主司之門然三日後主司堅請已即止同年初到集所
團司所繇輩參狀元後便參衆郎君拜訖俄有一吏當
中庭唱曰諸郎君就坐隻東雙西其日釀罰不少又出
抽名紙錢每人十千文其斂名紙見狀元俄於衆中薦
抽三五箇便出此錢鋪底一自狀元已下每人三十千
文

點檢文書

狀元錄事具啟事取人數主司於其間點請三五人工
於八韻五言者或文字乖訛便在點竄矣大約避廟諱
御名宰相諱然三十所製分為兩卷以金銅軸頭青縹
首進上

過堂

其日團司先於光範門裏東廊供帳備酒食同年於此
候宰相上堂後參見于時主司亦召知聞三兩人會於
他處此筵罰錢不少宰相既集堂吏來請名紙生徒隨

座主過中書宰相橫行在都堂門裏叙立堂吏通云禮部某姓侍郎領新及第進士見相公俄有一吏抗聲屈

主司乃登階長揖而退立於門側東向然後狀元已下

叙立於階上狀元出行致詞云今日禮部放榜某等

幸忝成名獲在相公陶鑄之下不任感懼

在左右下
即云慶懼

言

訖退揖乃自狀元已下一一自稱姓名稱訖堂吏云無

客主司復長揖領生徒退詣舍人院主司欄簡舍人公服鞞鞋延接主司然舍人禮貌謹敬有加隨事叙杯酒

後於階前鋪席褥請舍人登席諸生皆拜舍人答拜狀
元出行致詞又拜答拜如初便出於廊下候主司出一
揖而已當時諸宅謝恩便致飲席

關試

吏部員外其日於南省試判兩節諸生謝恩其日稱門
生謂之一日門生自此方屬吏部矣

讌名

大相識

主司在具慶

次相識

主司在偏侍

小相識

主司有兄弟

聞喜

勅士

宴櫻桃

月燈

打毬

牡丹

看佛牙

每人二千以
上佛牙樓寶

壽定水莊嚴皆有之寶壽量成佛牙用水精函子盛銀
菩薩捧之然得一僧跪捧菩薩多是僧錄或首座方得
捧之此最大宴亦謂之
離筵備述于前矣

今年及第明年登科

郭代云十八擢第其年冬制入高等

何扶太和九年及第明年捷三篇因以一絕寄舊同年
曰金榜題名墨尚新今年依舊去年春花間每被紅粧
問何事重來只一人

慈恩寺題名遊賞賦詠雜紀

進士題名自神龍之後過關宴後率皆期集於慈恩塔
下題名故貞元中劉太真侍郎試慈恩寺望杏園花發
詩會昌三年贊皇公為上相其年十一月十九日勅諫
議大夫陳商守本官權知貢舉後因奏對不稱旨十二
月十七日宰臣遂奏依前命左僕射兼太常卿王起主
文二十二日中書復奏奉宣旨不欲令及第進士呼有
司為座主趨附其門兼題名局席等條疏進來者伏以

國家設文學之科求貞正之士所宜行敦風俗義本君親然後申於朝廷必為國器豈可懷賞拔之私惠忘教化之根源自謂門生遂成膠固所以時風寢薄臣節何施樹黨背公靡不由此臣等商量今日已後進士及第任一度參見有司向後不得聚集叅謁及於有司宅置宴其曲江大會朝官及題名局席並望勒停緣初獲美名實皆少雋既遇春節難阻良遊三五人自為宴樂並無所禁唯不得聚集同年進士廣為宴會仍委御史臺

察訪聞奏謹具如前奉勅宜依於是向之題名各盡削去蓋贊皇公不由科第故設法以排之洎公失意悉復舊態

曲江遊賞雖云自神龍以來然盛於開元之末何以知之案實錄天寶元年勅以太子太師蕭嵩私廟逼近曲江因上表請移他處勅令將士為嵩營造嵩上表謝仍議令將士創造勅批云卿立廟之時此地閑僻今傍江修築舉國勝遊與卿思之深避喧雜事資改作遂命官

司承已拆除終須結構已有處分無假致辭

蕭穎士開元二十三年及第恃才傲物屢無與比常自携一壺逐勝郊野偶憇于逆旅獨酌獨吟會風雨暴至有紫衣老父領一小童避雨於此穎士見其散冗頗肆凌侮逡巡風定雨霽車馬卒至老父上馬呵殿而去穎士倉忙覘之左右曰吏部王尚書也穎士常造門未之面極所驚愕明日具長牋造門謝尚書命引至廡下坐而責之且曰所恨與子非親屬當庭訓之耳復曰子負

文學之名踞忽如此止於一第乎後穎士終於揚州功
曹

小歸尚書榜裴起部與邠之李搏先輩舊友搏以詩賀
廷裕曰銅梁千里曙雲開仙籍新從紫府來天上已張
新羽翼世間無復舊塵埃嘉禎果中君平卜賀喜須斟
卓氏盃應笑戎藩刀筆吏至今泥滓曝魚腮既而復以
二十八字謔之曰曾隨流水化凡鱗安上門前一字新
聞道蜀江風景好不知何似杏園春裴有六韻答曰何

勞問我成都事亦報君知便納降蜀柳籠堤煙矗矗海
棠當戶燕雙雙富春不並窮師子濯錦全勝旱曲江高
卷絳紗楊氏宅

時主文富楊子
巷故有此句

半垂紅袖薛濤窓浣花

泛鷁詩千首靜衆尋梅酒百缸若說絃歌與風景主人
兼是碧油幢

太和二年崔郾侍郎東都放榜西都過堂杜牧有詩曰
東都放榜未花開三十三人走馬迴秦地少年多釀酒
却將春色入關來

胡証尚書質狀魁偉膂力絕人與裴晉公度同年度嘗
狎遊為兩軍力人十許輩凌轢勢甚危窘度潛遣一介
求救於証証衣皂貂金帶突門而入諸力士睨之失色
証飲後到酒一舉三鍾不啻數升盃盤無餘瀝逡巡主
人上燈証起取鐵燈臺摘去枝葉而合其跗橫置膝上
謂衆人曰鄙夫請非次改令凡三鍾引滿一遍三臺酒
須盡仍不得有滴瀝犯令者一鐵躋自謂燈臺証復一舉三
鍾次及一角觥者凡三臺三遍酒未能盡淋漓逮至並

座証舉躋將擊之羣惡皆起設拜叩頭乞命呼為神人
証曰鼠輩敢爾乞汝殘命叱之令去

崔沆及第年為主罰錄事同年盧彖俯近關宴堅請假
往洛下拜慶既而淹緩久之及同年宴於曲江亭子彖
以彫幘載妓微服蹕鞚縱觀於側遽為團司所發沆判
之畧曰深攬席帽密映羶車紫陌尋春便隔同年之面
青雲得路可知異日之心

咸通中進士及第過堂後便以騾從車服侈靡之極稍

不中式則重加罰金蔣泳以故相之子少年擢第時家君任太常卿語泳曰爾門緒孤微不宜從世祿所為可先納罰錢慎勿以驟從也

盧文煥光化二年狀元及第頗以宴釀為急務常俯關宴同年皆患貧無以致之一旦給以遊齊國公亭子既至皆解帶從容文煥命團司牽驢時柳璨告文煥以驢從非已有文煥曰藥不瞑眩厥疾弗瘳璨甚銜之居四年璨登庸文煥憂戚日加璨每遇之曰藥不瞑眩厥疾

弗廖

曲江亭子安史未亂前諸司皆列於岸澣幸蜀之後皆燼於兵火矣所存者唯尚書省亭子而已進士關宴常寄其間既徹饌則移樂泛舟率為常例宴前數日行市駢闐於江頭其日公卿家傾城縱觀於此有若中東床之選者十八九鈿車珠鞍擲比而至或曰乾符中薛能尚書為大京兆楊知至侍郎將携家人遊致書於能假舫子先是舫子已為新人所假能答書云已為三十子

之鳩居矣知至得書怒曰昨日郎吏敢此無禮能自吏
部郎中拜京兆少尹權知大尹開成五年樂和李公榜
于時上在諒闇故新人遊賞率常雅飲詩人趙嘏寄贈
曰天上高高月桂叢分明三十一枝風滿懷春色向人
動遮路亂花迎馬紅鶴馭迥飄雲雨外蘭亭不在管絃
中居然自是前賢事何必青樓倚翠空

寶歷年中楊嗣復相公具慶下繼放兩膀時先僕射自
東洛入覲嗣復率生徒迎于潼關既而大宴於新昌里

第僕射與所執坐于正寢公領諸生翼坐于兩序時元
白俱在皆賦詩於席上唯刑部楊汝士侍郎詩後成元
白覽之失色詩曰隔坐應須賜御屏盡將仙翰入高冥
文章舊價留鸞掖桃李新陰在鯉庭再歲生徒陳賀宴
一時良史盡傳馨當年疏傳雖云盛詎有茲筵醉醪醴
汝士其日大醉歸謂子弟曰我今日壓倒元白

大順中王渙自左史拜考功員外同年李德鄰自右史
拜小戎趙光胤自補袞拜小儀王拯自小版拜少勳渙

首唱長句感恩上裴公曰青衿七十榜三年建禮含香
次第遷珠彩乍連星錯落桂花曾到月嬋娟玉經磨琢
多成器劍拔沈埋便倚天應念銜恩最深者春來為壽
拜尊前裴公答曰謬持文柄得時賢粉署清華次第遷
昔歲策名皆健筆今朝稱職並同年各懷器業寧推讓
俱上青霄宣後先何事老來猶賦詠欲將酌和永留傳
王起於會昌中放第二榜內道場詩僧廣宣以詩寄賀
曰從辭鳳閣掌絲綸便向青雲領貢賓再闢文場無枉

路兩開金榜絕寬人眼看龍化門前水手放鶯飛谷口
春明日定歸台席去鵲鷁原上共陶釣起答曰延英面
奉入青闈亦選功夫亦選奇在治只求金不耗用心空
學稱無私龍門變化人皆望鶯谷飛鳴自有時獨喜向
公誰是證彌天上士與新詩

周墀任華州刺史武宗會昌三年王起僕射再主文柄
墀以詩寄賀并序曰僕射十一叔以文學德行當代推
高在長慶之間春闈主貢採撫孤進至今稱之近者朝

廷以文柄重難將抑浮華詳明典實由是復委前務三
領貢籍迄今二十二年于茲亦縉紳儒林罕有如此之
盛況新榜既至衆口稱公墀忝沐深恩喜陪諸彥因成
七言四韻詩一首輒敢寄獻用導下情兼呈新及第進
士文場三化魯儒生二十餘年振重名曾忝木鷄誇羽
翼又陪金馬入蓬瀛

墀初年木鷄賦及第雖欣月桂居
當陪僕射守臧內庭

先折更羨春蘭最後榮欲到龍門看風水關防不許暫
離營時諸進士皆賀起答曰貢院離來二十霜誰知更

忝主文場楊葉縱能穿舊的桂枝何必愛新香九重每
憶同仙禁六義初吟得夜光莫道相知不相見蓮峰之
下欲徵黃

王起門生一榜二十二人和周墀詩嵩高降德為時生
洪筆三題造化名鳳詔佇歸專北極驪珠搜得盡東瀛
褒衣已換金章貴禁掖曾隨玉樹榮明日定知同相印

青衿新列柳間營

盧肇字
子發

公心獨立副天心三轄春闈

冠古今蘭署門生皆入室蓮峰太守別知音同升翰苑

時名重遍立朝端主意深新有受恩江海客坐聽朝夕

繼為霖

丁稜字子威

三年竭力向春闈塞斷浮華衆路岐盛

選棟梁稱昔日平均雨露及明時登龍舊美無斜徑折

桂新榮盡直枝莫道只陪金馬貴相期更在鳳凰池

姚鵠

字居雲

昔年桃李已滋榮今日蘭蓀又發生葑菲採時皆

有道權衡分處且無情叨陪鴛鴦朝天客共作門闌出

谷鶯何事感恩偏覺重忽聞金榜扣柴荆

退之自顧微劣始不敢以

四竊是望策試之後遂歸蓋屋山居不期一旦進士園
遣人賁榜扣闕相報方知忝幸矣
高退之字遵聖

當年門下化龍成今日餘波進後生仙籍共知推麗則

禁垣同得薦嘉名桃谿蚤茂誇新萼菊圃初開耀晚英

誰料羽毛方出谷許教齊和九臯鳴

孟球字庭玉

孔門頻建

鑄顏功紫綬青衿感激同一簣勤勞成太華三年恩德

重維嵩楊隨前輩穿皆中桂許平人折欲空慙和周郎

應見顧感知大造意無窮

劉耕字遵益

常將公道選羣生猶

被春闈屈重名文柄久持殊歲紀恩門三啟動寰瀛雲

霄幸接鴛鸞盛變化欣同草木榮乍得陽和如細柳參

差長近亞夫營

裴翻字雲章

滿朝簪紱半門生又見新書甲

乙名孤進自今開道路至公依舊振寰瀛雲飛太華清

詞著花發長安白屋榮忝受恩光同上客唯將報德是

經營

樊驥字彥龍

滿朝朱紫半門生新榜勞人又得名國器

舊知收片玉朝宗轉覺集登瀛同升翰苑三年美繼入

花源九族榮共仰蓮峰聽雪唱欲賡仙曲意怔營

崔軒字鳴

崗一振聲華入紫微三開秦鏡照春闈龍門舊列金章

貴鶯谷新遷碧落飛恩感風雷皆變化詩裁錦繡借光

輝誰知散質多榮忝鴛鴦清塵接布衣

蒯希逸字太隱

龍門一

變荷生成況是三傳不朽名美譽蚤聞喧北闕頽波今

見走東瀛鴛行既接參差影雞樹仍同次第榮從此青

衿與朱紫升堂侍宴更何營

林滋字後象

恩光忽逐曉春生

金榜前頭忝姓名三感至公裨造化重揚文德振寰瀛

佇為霖雨曾相賀半在雲霄覺更榮何處新詩添照灼

碧蓮峰下柳間營

李仙古字垂後

二十二年文教主三千上士

滿皇州獨陪宣父蓬瀛奏方接顏生魯衛遊多羨龍門

齊變化屢看雞樹第名流升堂何處最榮美朱紫環尊

幾獻酬

黃頗字無頗

三開文鏡繼芳聲暗接雲霄接去程曾

壓洪波先得路蚤升清禁共垂名蓮峰對處朱輪貴金

榜傳時玉韻成更許下才聽白雪一枝今過却詵榮

張道

符字常將公道選諸生不是鴛鴻不得名天上宴迴聯

步武禁中麻出滿寰瀛簪裾盡過前賢貴門館仍叨後

學榮看著鳳池相繼入都堂那肯滯關營

丘上卿字陪之

重德

由來為國生五朝清顯冠公卿風波久佇濟川楫羽翼

三遷出谷鶯絳帳青衿同日貴春蘭秋菊異時榮孔門

弟子皆賢哲誰料窮儒忝一名

石貫字
摠之

文學宗師心稱

平無私三用佐貞明恩波舊是仙舟客德宇新添月桂

名蘭署崇資金印重蓮峰高唱玉音清羽毛方荷生成

力難繼鸞鳳上漢聲

李潛字
德隱

科文又主守初時光顯門

生濟會期美擅東堂登甲乙榮同內署待恩私羣鶯共

喜新遷木雙鳳皆當即入池別有倍深知感士曾經兩

度得芳枝

孟字
虞中

儒雅皆傳德教行幾敦浮俗贊文明

龍門昔上波濤遠禁署同登渥澤榮虛散謬當陪杞梓
後先寧異感生成時方側席徵賢急況說謠謠近帝京
唐思言聖朝文德最推賢自古儒生少比肩再啟龍門
字子文

將二紀兩司鶯谷已三年蓬山皆美齊榮貴金榜誰知

忝後先正是感恩流涕日但思旌旆碧峰前
左牢字惠膠春

闡帝念主生成長慶公聞兩歲名有詔赤心同雨露無
私和氣決寰瀛龍門乍出難勝幸鴛侶先行是最榮遙

仰高峰看白雪多慚屬和意屏營
王甚夷字無黨長慶曾收間

世英早居臺閣冠公卿天書再受恩波遠金榜三開日
月明已見差肩趨翰苑更期聯步掌台衡小儒謬跡雲

霄路心仰蓮峰望太清

金厚載
字化光

曹汾尚書鎮許下其子希幹及第用錢二十萬榜至鎮
開賀宴日張之於側時進士胡錡有啓賀略曰桂枝折
處著萊子之綵衣楊葉穿時用魯連之舊箭

汾之名第
同故也

又曰一千里外觀上國之風光十萬軍前展長安之春
色

楊汝士尚書鎮東川其子知溫及第汝士開家宴相賀
營妓咸集汝士命人與紅綾一匹詩曰郎君得意及青
春蜀國將軍又不貧一曲高歌紅一匹兩頭娘子謝夫
人

華州榜薛侍郎諸門生詩曰時君過聽委平衡粉署華
燈到曉明開卷固難窺浩汗執心空欲慕公平機雲筆
舌臨文健沈宋篇章發韻清自笑觀光渾昨日披心爭
不愧羣生

盧相國鈞初及第頗窘於率費俄有一僕願為月傭服飾鮮潔謹幹不與常等覩鈞褊乏往往有所資時俯及關宴鈞未辦釀率撓形於色僕輒請罪鈞具以實告對曰極細事耳郎君可以處分最先後勾當何事鈞初疑其妄既而將覘之給謂之曰爾若有伎吾當主宴第一要一大第為備宴之所次則徐圖其僕唯而去頃刻乃迴白鈞曰已稅得宅矣請幾郎檢校翌日鈞強往看之既而朱門甲第擬于宮禁鈞不覺欣然復謂曰宴處即

大如法此尤不易張陳對曰但請選日啟聞侍郎張陳
某請專掌釣始慮其非反覆詰問但微笑不對或意其
非常人亦不固於猜疑既宴除之日釣止于是俄觀幕
帶茵毳華煥無比此外松竹花卉皆稱是釣之釀率畢
至由是公卿間靡不誇詫詰朝其僕請假給還諸色假
借什物因之一去不返逮旬日釣異其事馳往舊遊訪
之則向之花竹一無所有但見頽垣壞棟而已議者以
釣之仁感通神明故為曲贊一春之盛而成此終身之

美

盧肅鈞之孫貞簡有祖風光化初華州行在及第洎大
寇犯闕二十年搢紳靡不編乏肅始登第俄有李鴻者
造之願傭力鴻以錐刀暇日往往反資於肅此外未嘗
以所須為意肅有舊業在南陽常令鴻徵租皆如期而
至往來千里而未嘗侵費一金既及第鴻奔走如初及
一春事畢鴻即辭去

新進士尤重櫻桃宴乾符四年永寧劉公第二子覃及

第時公以故相鎮淮南勅卽吏日以銀一錠資覃醵罰而覃所費往往數倍卽吏以聞公命取足而已會時及薦新狀元方議醵率覃潛遣人厚以金帛預購數十石矣于是獨置是宴大會公卿時京國櫻桃初出雖貴達未適口而覃山積鋪席復和以糖酪者人享蜜棗一小盞亦不啻數升以至參御輩靡不霑足

羅玠貞元五年及第關宴曲江泛舟舟沈玠以溺死後有關宴前卒者謂之報羅

宣慈寺門子不記姓氏酌其人義俠之徒也咸通十四年韋昭範先輩登第昭範乃度支侍郎楊嚴懿親宴席間帝幕器皿之類皆假于計司楊公復遣以使庫供借其年三月中宴於曲江亭供帳之盛罕有倫擬時飲興方酣俄覩一少年跨驢而至驕恃之狀旁若無人於是俯逼筵席長耳引頸及肩復以巨筆振築佐酒謔浪之詞所不忍聆諸君子駭愕之際忽有於衆中批其頰者隨手而墜於是連加毆擊復奪所執筆筆之百餘衆皆

致怒瓦礫亂下殆將斃矣當此之際紫雲閣門輒開有紫衣從人數輩馳告曰莫打莫打傳呼之聲相續又一中貴驅殿甚盛馳馬來救門子乃搯簷迎擊中者無不面仆於地勅使亦為所箠既而奔馬而返左右從而俱入門亦隨閉而已座內甚欣媿然不測其來仍慮事連宮禁禍不旋踵乃以緡錢束素召行毆者訊之曰爾何人與諸郎君誰素而能相為如此對曰某是宣慈寺門子亦與諸郎君無素第不平其下人無禮耳衆皆嘉嘆

悉以錢帛遺之復相謂曰此人必須亡去不則當為擒
矣後旬朔座中賓客多有假途宣慈寺門者門子皆能
識之靡不加敬竟不聞有追問之者

裴思謙狀元及第後作紅牋名紙十數詣平康里因宿
於里中詰旦賦詩曰銀釭斜背解鳴璫小語偷聲賀玉
郎從此不知蘭麝貴夜來新惹桂枝香

鄭合敬先輩及第後宿平康里詩曰春來無處不閑行
楚閨相看別有情好是五更殘酒醒時時聞喚狀頭聲

楚娘閨娘
妓之尤者

盧肇袁州宜春人與同郡黃頗齊名頗富於產肇幼貧
乏與頗赴舉同日遵路郡牧於離亭餞頗而已時樂作
酒酣肇策蹇郵亭側而過出郭十餘里駐程侯頗為侶
明年肇狀元及第而歸刺史以下接之大慙憲會延肇
看競渡於席上賦詩曰向道是龍剛不信果然銜得錦

標歸

錦標船
頭所得

薛監晚年厄於宦途嘗策羸赴朝值新進士榜下綴行

而出時進士團所由輩數十人見逢行李蕭條前導曰
迴避新郎君逢輾然即遣一介語之曰報道莫貧相阿
婆三五少年時也曾東塗西抹來

許畫者睢陽人也薄攻五字詩天復四年大駕東幸駐
驛甘棠畫於此際及第梁太祖長子號大卿郎君者常
與畫屬和畫以卿為奧主隨駕至洛下携同年數人醉
於梁祖私第因折牡丹十許朵主吏前白云凡此花開
落皆藉其數申令公秀才奈何恣意攀折畫慢罵久之

主吏銜之潛遣一介馳報梁祖梁祖聞之頗睚眦獨命
械畫而獻于時大卿竊知間道先遣使至晝遂亡命河
北莫知所之

鄭光業新及第年宴次有子女卒患心痛而死同年皆
惶駭光業撤筵中器物悉授其母別徵酒器盡歡而罷
乾符四年諸先輩月燈閣打毬之會時同年悉集無何
為兩軍打毬軍將數輩私較於是新人排比既盛勉強
遲留用抑其銳劉覃謂同年曰僕能為羣公小挫彼驕

必令解去如何狀元已下應聲請之覃因跨馬執杖躍而揖之曰新進士劉覃擬陪奉可乎諸輩皆喜覃驟馳擊拂風驅雷逝彼皆睜眦俄策得毬子向空磔之莫知所在數輩慙沮俛而去時閣下數千人因之大呼笑久而方止

咸通十三年三月新進士集於月燈閣為感鞠之會擊拂既罷痛飲于佛閣之上四面看棚櫛比悉皆褰去帷箔而縱觀焉先是飲席未合同年相與循檻肆覽鄒希

回者年七十餘勝末及第時同年將欲即席希回堅請
更一巡歷衆皆笑或謔之曰彼亦何敢望回

大中十年鄭顥都尉放勝請假往東洛覲省生徒餞於
長樂驛俄有紀于屋壁曰三十驂騑一烘塵來時不鎖
杏園春楊花滿地如飛雪應有偷遊曲水人

乾符丁酉歲關宴甲於常年有溫定者久困場屋坦率
自恣尤憤時之浮薄設奇以侮之至其日蒙衣肩輿金
翠之飾宴出于衆侍婢皆稱是徘徊於柳陰之下俄頃

諸公自露棚移樂登鷁首既而謂是豪貴其中姝麗因遣促舟而進莫不注視於此或肆調謔不已羣興方酣定乃於簾間垂足定膝脰偉而毳衆忽覩之皆掩袂亟命迴舟避之或曰此必溫定矣

乾寧末駕幸三峯太子太師盧知猷於西溪亭子赴進士關宴因謂前達曰老夫似這關宴至今相繼赴三十箇矣

李曉及第在偏侍下俯逼起居宴霖雨不止遣賃油幕

以張設之嶢先人舊廬升平里凡用錢七百緡自所居連亘通衢殆及一里餘參御輩不啻千餘人羈馬車輿闐咽門巷來往無有霑濡者而金碧照耀頗有嘉致嶢時為丞相韋都尉所委干預政事號為李八郎其妻又南海韋宙女宙常資之金帛不可勝紀

神龍已來杏園宴後皆於慈恩寺塔下題名同年中推一善書者紀之他時有將相則朱書之及第後知聞或遇未及第時題名處則為添前字或詩曰曾題名處添

前字送出城人乞舊詩

苗台符六歲能屬文聰悟無比十餘歲博覽羣籍著皇
心三十卷年十六及第張讀亦幼擅詞賦年十八及第
同年進士同佐鄭薰少師宣州幕二人嘗列題於西明
寺之東廡或竊注之曰一雙前進士兩箇阿孩兒台符
十七不祿讀位至正卿

李湯題名於昭應縣樓韋蟾觀之走筆留謔曰渭水秦
川拂眼明希仁何事寡詩情只因學得虞姬壻書字纔

能記姓名

裴晉公赴敵淮西題名華岳之闕門大順中戶部侍郎
司空圖以一絕紀之曰岳前大隊赴淮西從此中原息
戰鞞石闕莫教苔蘚上分明認取晉公題

白樂天一舉及第詩曰慈恩塔下題名處十七人中
最少年樂天時年二十七省試性習相近遠賦玉水記方
流詩携之謁李涼公逢吉公時為校書郎于時將他適
白遽造之逢吉行携行看初不以為意及覽賦頭曰噫

下自人上達君咸德以慎立而性由習分逢吉大奇之
遂寫二十餘本其日十七本都出

論曰科第之設沿革多矣文皇帝撥亂反正特盛科名
志在牢籠英彥邇來林栖谷隱櫛比鱗差美給華資非
第勿處雄藩劇郡非第勿居斯乃名實相符亨達自任
得以惟聖作則為官擇人有其才者靡捐於甕牖繩樞
無其才者詎繫於王孫公子莫不理推畫一時契大同
垂三百年擢士衆矣然此科近代所美知其美之所美

者在乎端已直躬守而勿失昧其美之所美者在乎貪
名巧宦得之為榮噫大聖設科以廣其教奈何昧道由
徑未旋踵而身名俱泯又何科第之庇乎矧諸尋芳逐
勝結友定交競車服之鮮華騁杯盤之意氣沾激價譽
周行藏始膠漆於羣強終短長於逐末乃知得失之
道坦然明白丘明所謂求名而亡欲蓋而彰苟有其實
又何科第之闕歟

唐撫言卷三

總校官庶吉士臣侍朝

校對官庶吉士臣戴心亨

謄錄監生臣徐繩玉

欽定四庫全書薈要

子部

唐撫言卷

四至
七

詳校官兵部主事臣雷純



欽定四庫全書會要卷一萬一千二百五十

子部

唐撫言卷四

唐 王定保 撰

節操



裴晉公質狀眇小相不入貴既屢屈名場頗亦自惑會

有相者在洛中大為搢紳所神公時造之問命相者曰
郎君形神稍異于人不入相書若不至貴即當餓死然
今則殊未見貴處可別日垂訪勿以蔬糲相鄙候旬日

為郎君細看公然之凡數往矣無何阻朝客在彼因退
遊香山佛寺徘徊廊廡之下忽有一素衣婦人致一緹
絹於僧伽和尚欄楯之上祈祝良久復取笏擲之叩頭
瞻拜而去少頃度方見其所致意彼遺忘既不可追必
料其再至因為收取躊躇至暮婦人竟不至度不得已
携之歸所止詰旦復携至彼時寺門始開俄覩向者素
衣疾趨而至逡巡撫膺惋嘆若有非橫度從而訊之婦
人曰新婦阿父無罪被繫昨告人假得玉帶二犀帶一

直千餘緡以遺津要不幸遺失於此今老父不測之禍
無所逃矣度憮然復細詰其物色因而授之婦人拜泣
請留其一度不顧而去尋詣相者相者審度顏色頓異
大言曰此必有陰德及物此後前途萬里非某所知也
再三詰之度偶以此言之相者曰祇此便是陰功矣他
日無相忘勉旃勉旃度果位極人臣

盧大郎補闕

盧名上字與僕家諱同下字曰暉

升平鄭公之甥也暉少

孤長於外氏愚常誨之舉進士咸通十一年初舉廣明

庚子歲遇大寇犯闕竄身南服時外兄鄭續鎮南海暉
向與續同庠序續仕州縣官暉自號白衣卿相然二表
俱為愚鍾愛爾來未十稔續為節行將暉乃窮儒復脫
身虎口挈一囊而至續待之甚厚時大駕幸蜀天下沸
騰續勉之出處且曰人生幾何苟富貴可圖何須一第
耶暉不答復請賓佐誘激者數四復虛右席以待暉暉
因曰大朝設文學之科以待英俊如暉能否焉敢期於
饗養然聞昔舅氏所最常以一第見勉今舊館寂寥奈

何違夙昔之約苟白衣沒世亦其命也若見利改圖有死不可續聞之加敬自是龍鍾塲屋復十許歲大順中方為弘農公所擢卒於右袞

孫泰山陽人少師皇甫穎守操頗有古賢之風泰妻即姨妹也先是姨老矣以二子為託曰其長損一目汝可娶其女弟姨卒泰娶其姊或詰之泰曰其人有廢疾非泰不可適衆皆伏泰之義嘗於都市遇鐵燈臺市之而命洗刷即銀也泰亟往還之中和中將家于義興置一

別墅用緡錢二百千既半授之矣泰遊吳興郡約迴日
當詣所止居兩月泰迴停舟途步復以餘資授之俾其
人他徙于時覩一老嫗長慟數聲泰驚悸召詰之嫗曰
老婦常追事翁姑于此子孫不肖為他人所有故悲耳
泰憮然久之因給之曰吾適得京書已別除官固不可
駐此也所居且命爾子掌之言訖解維而逝不復返矣
子展進士及第入梁為省郎

論曰范宣之三立德居其首夫子之四科行在其先矧

乃五常者總之於仁百慮者試之於利禍福不能迴至
德貧富不能窺至仁夫炯戒之倫而窮達不侔者其惟
命與苟屆諸道又何窮達之異致矣

與恩地舊交

劉虛白與太平裴公蚤同硯席及公主文虛白猶是舉
子試雜文日簾前獻一絕句曰二十年前此夜中一般
燈燭一般風不知歲月能多少猶著麻衣待至公

五
系
手
長
子
小
愧
公
放
榜
日
紫
出
行
曲
謝
沆
泣
曰
先
輩

吾師也。沆泣榮亦泣榮，出入塲籍三十餘年。

長孫籍與張公舊交，公兄呼籍，公常諷其改圖籍曰朝聞道夕死可矣。

師友

李華以文學名，重于天寶末。至德中，自前司封員外起為相國李梁公峴從事，檢校吏部員外。時陳少遊鎮淮陽，尤仰公之名。一旦城門吏報華入府，少遊大喜，簪笏待之。少頃復曰：「云已訪蕭公功曹矣，即穎士也。」

廬江何長師趙郡李華范陽廬東美少與韓衢為友江
淮間號曰四夔

裴佖字弘正宰相耀卿之孫吏部郎中綜之子卒於工
部尚書鄭餘慶請先行朋友服佖謚曰貞子曰泰章

喬潭天寶十三年及第任陸渾尉時元魯山客死是邑
潭減俸禮葬之復卹其孤李華三賢論云潭昂之孫有
古人風李華稱元德秀張友略志如道德行如經術

貞元十二年李贄以大宏詞振名與李敏同姓同年同

登第又同甲子

及第時俱二十五歲

又同門贄嘗答行敏詩曰因

緣三紀異契分四般同

隴西李舟與齊相國映友善映為將相舟為布衣而舟致書於映以交不以貴也時映左遷於夔舟書曰三十三官足下近年以來宰臣當國多與故人禮絕僕以禮處足下則足下長者僕心未忍欲以故人處足下則慮悠悠之人以僕為詭欲修書逡巡至今忽承足下出守夔國於蒼生之望則為不幸為足下謀之則名遂身退

斯又為佳僕昧時者謹以為賀但鄱陽雲安道阻且長
音塵寂蔑永以增嘆僕所疾沈痼方率子弟力農為世
疎矣足下亦焉能不疎僕耶足下素志僕所知之其於
得喪固怡如也然朝臣如足下寡矣明王豈當不察之
耶惟強飯自愛珍重珍重

李華祭蕭穎士文維乾元三年二月十日孤子趙郡李
華以清酌之奠敬祭于亡友故揚府功曹蘭陵蕭公之
靈嗚呼茂挺平生相知情體如一歲月之別俄成古今

天乎喪予此痛何極華釁罰深重艱難所鍾殊方永慕
觸目號裂途窮易感況哭故人以足下才惟挺生名蓋
天下道孤命屈淪阨終身避亂全絜忠也冒危遷祔孝
也有王佐之才先師之訓而沒於道路何負於天乎痛
哉華疇昔之歲幸忝周旋足下不棄愚劣一言契合古
稱管鮑今則蕭李有過必規無文不講知名當世實類
無人循環往復何日忘此存沒實等泣血千里羈旅相依
聞其一哀心骨皆斷夫痛之至者言不能宣雖欲寄詞

祇益填塞茂挺君其降靈尚饗

韓文公瘞硯文隴西李元賓始從進士貢在京師或貽之硯四年悲歡否泰未嘗廢用凡與之試藝春官實二年登上第行于褒谷間役者誤墜之地毀焉乃匣歸埋於京師里中昌黎韓愈其友人也贊而識之土乎成質陶乎成器復其質非生死類全斯用毀不忍棄埋而識之仁之義硯乎硯乎瓦礫異

杜工部交鄭廣文嘗以詩贈虔曰諸公衮衮登臺省廣

文先生官獨冷甲第紛紛厭梁肉廣文先生飯不足先生有義出羲皇先生所孤或屈宋德尊一代常壙坎名垂萬古知何用杜陵野老人更嗤短褐身窄鬢如絲日糴太倉五升米時赴鄭老同襟期得錢則相覓沽酒不復疑忘形到爾汝痛飲真吾師清夜沈沈動春酌燈前細雨簷花落但覺高歌有鬼神焉知餓死填溝壑相如逸才親滌器子雲識字終投閣先生蚤賦歸去來石田茅屋荒蒼苔儒術于我何有哉孔丘盜跖俱塵埃不須

聞此意慘淡生前相遇且銜盃又曰廣文到官舍繫馬
堂階下醉則騎馬歸頻遭官長罵垂名三十年坐客寒
無氈賴得蘓司業時時與酒錢及虔即世甫賦八哀詩
其一章誅虔也

崔羣字敦詩貞元八年陸贄下及第與韓愈為友羣佐
宣州幕時愈與羣書論交略云考之百行而無瑕尤窺
之閫奧而不見畛域明白淳粹輝光日新者唯吾崔君
一人僕愚陋無所知曉然聖賢之書無所不讀其精麗

巨細出入晦明雖不盡識抑不可謂不涉其源者也以此而推而度之誠知足下出羣拔萃無謂僕從何而得也

劉駕與曹鄴為友俱攻古風詩鄴既擢第而不即出京俟駕成名同去果諧所志

毛傑與盧藏用書月日雲夢子毛傑謹致書于盧公足下傑聞君子所貴者道也所好者才也故才高則披襟而論翰墨道狎則言事而致談笑何必雞鳴狗盜始資

僥倖之能簞食瓢飲不顧清虛之用自公立名休代博
物多能帝曰爾諧擢為近侍所以從容禁省出入鎖闥
忠弼在躬優柔荐及傑時在草莽運厄窮愁思折俎而
無因嗟掃門而不逮豈知羣邪遘逆聯聲嗷嗷紫奪我
朱遠詣惡土賴公神色自若心行不逾餌芝朮以養閑
坐煙簞而收思傑梁鴻遠旅閔仲未歸留戀德音徘徊
失路互鄉童子當願接於宣尼蘓門先生竟未言於阮
籍公於傑者如彼僕於公者若此百年朝夕何事惜于

交遊四海兄弟何必輕于行路賈生不云乎達人大觀
物無不可小智自私賤彼貴我況公拂衣高尚習靜閑
局世事多捐尤精道意豈有自私而已無大觀者哉倘
能憐雲壑獎無知慙張良小子說鴻蒙之偈遺黃石之
書虛往實歸霑霧露之微潤裒多益寡落丘山之一毫
則知足下之眷深焉小人之慶畢矣

盧答毛書毛子足下勤身訪道不毒氛瘴裹糧鬼門放
蕩雲海有足多矣一昨不遺猥辱書札期我還意詢子

道真使人慚愧也僕知之矣士之生世則有冥志深蔽
滅跡穹室鍊九還以咽氣味三秀以詠言固將養蒙全
理不以能鳴天性則其上也義感當途說動時主懷全
德以自達裂山河以取貴又其次也至于誠信不申忠
孝胥缺獨禦魑魅永投豺虎無面目以可數椎心膺以
問天斯最下也僕在壯年嘗慕其上先貞後黷卒罹憂
患負家為孽置身于此何顏復講道德哉雖然少好立
言亟聞長者之說老而彌篤猶憐薄暮之晷加我數年

庶無大過覽莊生鷗鵬之喻則乾坤龍馬之旨可好矣
培風運海則六九之源無差矣隳之正氣則洗心藏密
有由矣開卷獨得恬然會真不知寰宇之寥廓不知生
之與謝斯亦曖昧所守何必為是倘吾人起予指掌而
說今之隱几不亦樂乎道在稊稗無相阻曷為區區過
勞按劍也頃風眩成疾下泪復厲筆力此還答無所銓
次淹遲逾期庶不我責盧藏用頓首

方干師徐凝干常刺凝曰把得新詩草裏論反語曰村

裏老李頻師方干後頻及第詩僧清越贈干詩云弟子
已得桂先生猶灌園

韓文公名播天下李翱張籍皆升朝籍北面師之故愈
答崔立之書曰近有李翱張籍者從予學文翱與陸倕
員外書亦曰韓退之之文非茲世之文也古之文也其
人非茲世之人古之人也後愈自潮州量移宜春郡郡
人黃頗師愈為文亦振大名頗常覩盧肇為碑版則唾
之而去案實錄愈與人交其有淪謝皆能卹其孤復為

畢婚嫁如孟東野張籍之類是也

李義山師令狐文公呼小趙公為郎君於文公處稱門生

氣義

郭代公年十六入太學與薛稷趙彥昭為友時有家信至寄錢四十萬以為學糧忽有一縑服者扣門云五代未葬各在一方今欲同時舉大事乏於資財聞公家信至頗能相濟否公即命以車一時載去畧無存者亦不

問姓氏深為趙薛所誚元振怡然曰濟彼大事亦何誚焉其年為糧食斷絕竟不成舉

熊執易赴舉行次潼關秋霖月餘滯於逆旅俄聞鄰店有一士吁嗟數四執易潜伺之曰前堯山令樊澤舉制科至此馬斃囊空莫能自進執易造焉遽輟所乘馬倒囊濟之執易其年罷舉澤明年登科

代公為通泉縣尉掠賣千餘人以供過客天后異之召見大愜意旨并口占古劍一篇以進上奇之命繕寫當

直學士

楊虞卿及第後舉三篇為校書郎來淮南就李鄴親情
遇前進士陳商啟護窮窘公未相識問之倒囊以濟

李北海年十七携三百縑就納國色偶遇人啟護倒囊
濟之

許棠久困名場咸通末馬戴佐大同軍幕棠往謁之一
見如舊相識留連數月但詩酒而已未嘗問所欲一旦
大會賓客命使者以棠家書授之棠驚愕莫知其來啟

絨卽知戴潛遣一介卹其家矣

贊曰孰以顯廉臨財不苟孰以定交弘道則久窮乃益
堅達以胡有無得無喪天長地久君子行之小人則否



唐撫言卷四